

三才圖會新考

第三冊
卷七 人物
卷八 藝文

永壽縣新志卷七目

人物

名臣

循吏

儒林

文苑

忠節

孝義

獨行

寓賢

方技

永壽縣新志卷七目

仙釋

列女

永壽縣新志卷七

知縣蔣基重修

人物類名臣獨行

循吏
寓賢

儒林
方技

文苑
仙釋

忠節
列女

孝義

名臣

隋

隋書杜彥傳彥雲中人徙家於南豳性勇果善技射仕周為左侍上士擊破陳將吳明徹又擊叛蠻進平郢州賊帥樊志以功拜大都督賜爵永安縣伯從韋孝寬擊尉遲迥於相州每戰有功封襄城縣侯開皇初進爵為公平陳之役以行軍總管渡江擊南陵城拔之擒其守將許翼進位柱國復從楊素討破江南羣盜拜洪州總管甚有治名歲餘徵拜雲州總管突厥來寇彥輒禽斬之北夷畏憚不敢至塞未幾以疾徵還卒

唐

唐書來瑱傳瑱邠州永壽人父曜奮行間開元末持節磧西副大使四鎮節度使著名西邊終右領軍瑱略知書尚名節崖然大有志天寶初從四鎮任劇職累遷殿中侍御史伊西北庭行軍司馬詔舉智謀果決才堪統眾者拾遺張鎬薦瑱能斷大事有禦侮才擢潁川太守充招討使會母喪免以孝聞安祿山反張珀薦之守潁川賊來攻瑱前後俘殺甚眾賊懼目為來嚼鐵以功就加防禦使河南淮南游奕逐要招討使徙山南東道節

度使代魯炅會嗣虢王巨表炅方固守乃還瑱故官賊圍南陽急人情恟懼瑱能撫訓士卒舉動安重賊不得侵改淮南西道節度使兩京平封潁國公食二百戶乾元二年徙河南未行王師敗於相州詔拜陝虢節度兼潼關防禦團練鎮守使明年徙山南東道襄鄧均房金商隨郢復十州節度使上元二年春破史思明餘黨於魯山俘賊渠又戰汝州獲馬牛橐駝凡兩戰斬首萬級改山南東道襄鄧唐復隨郢六州節度代宗立復使鎮襄州入朝拜兵部尚書同平章事充山陵使是時程元振居中用事疾瑱乃告與巫祝言不順帝怒遂下詔削其官貶播州卒後帝徐悟元振誣以他罪流溱州廣德

永壽縣新志卷七

二

元年追復瑱官爵

學冊入鄉賢祠

按葉少蘊避暑錄話唐書來瑱傳云始用張鎬薦爲潁川大守以母憂去祿山反再用張垙薦奪喪復爲潁川今考杜周人物志至德初詔朝臣舉所知蕭昕爲起居舍人薦張鎬以褐衣召見拜左拾遺而來瑱爲潁川太守在天寶十四載卽至德元年祿山反後是時鎬方起家何能及瑱而張垙兄弟自京師陷卽叛從祿山未嘗見明皇亦何由復薦瑱史於瑱事不無謬誤也

明

陝西通志 楊儀字鴻羽乾州永壽人宏治中登進士第

慕宋王沂公之爲人立志不在溫飽一時咸以公輔期之歷官山東參政揚清激濁所至赫赫有聲

循吏

明

舊志劉聚成化辛丑進士知永寧縣值歲荒聚廉能有善政饑而不害 騫璿由舉人仕至同知歷二十載吏畏民懷謝政里居人服其敬信 劉宣以鴻臚鳴贊擢彭水令清介不渝 王相由貢生任通判老成忠實不事浮華 趙鑾由貢生任縣丞廉介有芳聞 張其蘊親喪廬墓三載後以延安司訓署鄜州事多惠政抵里

囊橐蕭然

學冊劉聚騫璿二人入鄉賢祠

永壽縣新志卷七

三

張志楊威例貢生以營繕才判亳州江津兩地卓有聲稱

儒林

漢

後漢書李育傳育右扶風漆人少習公羊春秋沈思專精博覽書傳知名太學深爲同郡班固所重薦育於東平王蒼由是京師貴戚爭往交之州郡請召育到輒辭病去避地教授門徒數百涉獵古學嘗讀左氏傳謂不得聖人深意作難左氏義四十一事建初元年衛尉馬廖舉育方正爲議郎後拜博士四年詔與諸儒論五經於白虎觀育以公羊義難賈逵往返皆有理證最爲通

儒再遷尚書令及馬氏廢育坐爲所舉免歸歲餘復徵再遷侍中卒於官

宋

郟縣志永壽人焦寅湛深經術張橫渠師之

明

舊志俎簠由貢生官教諭恭儉有學術不愧師儒風範

王宏謨由歲貢官信陽州訓導操守清介貫穿經傳

本朝

縣冊張星聯在永里人爲諸生耻俗學志古儒者恂恂

蘊藉負狷性居家門無雜賓所著詩文盈篋焚棄無復

存者當事重其爲人往往求一識面而不可得時謂段

永壽縣新志卷七

四

于泄柳復見於今晚歲以明經舉鄉飲賓未赴而卒

文苑

宋

隆平集史天常邠州永壽人熙寧中仕至朝散大夫爲

人端厚沈敏強學多識文詞溫潤詩亦閒遠雅懷溪山

趣適號漆上先生有漆泉集十卷行於世

漆泉在縣東北

忠節

明

張志任棟由貢生授萊州府通判歷陞海防道協勦闖

賊會淫雨兵潰遂陷重圍大呼曰我監軍也恨不斬賊

萬段遇害於朱仙鎮

學冊入鄉賢祠

表忠錄保定監軍道任棟力解汴圍因左兵潰陣而死
棟永壽人貢生

按二說稍異存其人不必覈其事傳疑正以表忠也

張志趙士達由歲貢任莊浪教授素性剛直有長者風
賊破城被執罵賊而死 張應泰貢生賊破堡手刃數
賊賊怒割其脣 張惟一貢生應泰姪罵賊奮不欲生
賊義而釋之 王良化拔貢生賊僭稱帝號強授以官
抗節不仕

按以上所謂賊皆指李自成也明末闖寇流毒蹂躪
關中蔓延及下邑而永以蕞爾山陬不少效忠秉節
之士彼有人焉爲詠疾風勁草句矣

孝義

元

陝西資政錄白用字器之居縣之北市引泉入城內民
利賴之素有出塵之想結廬泉上犢鼻逍遙每見渠水
洩卽爲補葺入鄉賢祠

明

舊志樊志賢留村里人五世同居 陳粟永康里人割
股療母病鄉人稱孝子 宋寧彭村里人隆慶二年饑
同弟宁各輸粟百石民藉以存活者甚衆 楊守奇強
化里人傭工葬父拾得涇陽客遺金二十俟其至付之
令給扁以表其門 樊整留村里人兄遺男周歲撫育

成立析已產給之年百有五鄉人稱爲百歲公咸慕其德福兼備

陝西資政錄楊邦梁乾州永壽人通判威之子由貢生授檢校官內行純備見義敢爲嘗讀宋史劉几傳謂邠地鹵民病遠汲几浚渠引水水果至鑿五池於通達民大便利慨然奮曰淪水利人古賢且有創爲之者况吾邑有呂公白氏舊渠可因其利以利之乎於是鳩工疏鑿凡餼糧器用諸費咸自辦之竟復舊貫入鄉賢祠

本朝

縣冊張琬上彭里貢生鄉飲大賔幼聘廩生梁紹模女

爲室未婚而女得疾一目盲家人慮其不任婦職勸琬辭婚琬慨然曰聘在前盲在後命也我弗娶將誰歸卒娶之後舉四子元佐元愷元傑元仕皆有聲鬢序中孫中慮亦能嗣其業曾孫玉梁已酉拔貢時咸謂不棄盲女之一念有以肇之 元愷琬次子太學生慷慨好施乾隆十七二十六並三十六年年不順成元愷散貲借粟村中五六十家胥賴以存濟又善解紛息訟里人俱以長厚推之 元傑琬第三子武生事繼母以孝聞時募修 文廟垂成物力頓絀元傑乃鬻產得數百金悉捐以充用由是克漬於成人服其義

獨行

明

舊志魯邦輔車村里人真醇慷慨令署爲亭長萬歷丙戌丁亥大旱貧不能舉火有饋食者卻不受闔家餓而死

寓賢

漢

史記婁敬傳敬齊人漢五年戍隴西過洛陽高帝在焉敬脫輓輅衣其羊裘因齊人虞將軍見上說上都秦高帝問羣臣羣臣皆山東人爭言周王數百年秦二世卽亡不如都周上疑未能決及留侯言之上卽日車駕西都關中賜敬姓劉氏拜郎中號奉春君後封建信侯

舊志敬晚年投閒好時有異術種金利人今明月山有種金坪將卒召里人囑曰爲廟祀我我有以福汝矣頃之雲霞飛集而逝

漢書陸賈傳賈楚人以客從高祖定天下使南越令趙佗稱臣奉漢約歸報高帝大悅拜賈爲太中大夫孝惠時呂太后用事欲王諸呂畏大臣及有口者賈自度不能爭迺病免以好時田地善徃家焉有五男迺出所使越橐中裝賣千金分其子子二百金令爲生產賈常乘安車駟馬從歌鼓瑟侍者十人詔其子曰與汝約過汝汝給人馬酒食極飲十日而更

唐

全唐詩長孫無忌字機輔河南洛陽人文德皇后之兄好學有籌略佐太宗定天下以功第一封齊國公歷尚書僕射司空戒懼盈滿固辭不許復拜司徒貞觀十七年圖功臣二十四人於凌煙閣無忌爲之對高宗卽位進冊太尉知門下省後爲許敬宗誣搆貶死黔州

新舊唐書

俱有傳文
繁不具錄

舊志長孫無忌河南人太宗面定勲臣圖凌煙閣皆第一爲吏部尚書議定建令寬絞刑五十條貞觀七年以開府儀同三司爲司空固辭曰臣忝預外戚恐天下謂陛下私不許十七年進太子太師帝疾篤謂太子曰無忌盡忠於我我有天下多其力也勿令讒人間之與褚

遂良同受顧命高宗初諫立武昭儀貶黔州投繯卒

按趙公之寓居永壽史傳皆無明文然長孫氏聚族居縣東之永壽坊已歷數十世比有武生長孫步雲自稱紹先二十四代孫曾修祖墓之在堡城北缺上者及詢其世譜則云自紹先以後俱失之今考唐書宰相世系表長孫氏出自拓拔鬱律鬱律生二子長曰沙漠雄次卽道武帝沙漠雄生嵩道武帝以嵩宗室之長改爲長孫氏此長孫得姓之始也孝文帝太和詔自代北而徙者皆爲河南洛陽人自嵩至無忌蓋第十三世矣無忌生冲冲生延延生元翼元翼生訓訓生釗釗生守貞守貞生全緒全緒生燧燧生

四子紹先恭先孝先稚先意者長孫氏始遷永壽之祖其卽紹先兄弟歟夫趙公於太宗爲元勳於高宗爲元舅位尊任重何嘗一日離廟堂泊乎遭讒遠貶耆親以上遷謫靡遺又無由得至永壽內地也審矣舊志但因長孫氏裔孫家此遂指趙公爲是邦之寓賢所謂附會之辭初非實錄識者詳之

唐書安金藏傳金藏京兆長安人在太常工籍睿宗爲皇嗣少府監裴匪躬中官范雲仙坐私謁皇嗣皆誅死自是公卿不復見惟工優給使得進俄有誣皇嗣異謀者武后詔來俊臣問狀左右畏慘楚欲引服金藏大呼曰公不信我言請剖心以明皇嗣不反也引佩刀自割

腹中腸出被地眩而仆武后聞大驚輿致禁中命高醫內腸褫桑土紕之閱夕而蘓后臨視嘆曰吾有子不能自明不如爾之忠也卽詔停獄睿宗乃安景龍時擢右驍衛將軍爵代國公卒配饗睿宗廟廷大歷中贈兵部

尙書諡曰忠

學冊入鄉賢祠

舊志今縣南有安金藏墓并安家空鋪

按舊志謂縣境有安家墳控遂以金藏爲永壽人推爲人物之首張志雖知爲長安人然僅據陝西通志不知有新舊唐書可證也今日爲寓賢庶不沒其實耳

方技

晉

〔晉書苻堅載記〕新平人王彫陳說圖讖嘗言於堅曰謹案讖云古月之末辭中州洪水大起健西流惟有雄子定八州此卽三祖陛下之聖諱也又云當有草付臣又土滅東燕破白虜氏在中華在表案圖讖之文陛下當滅燕平六州願徙汧隴諸氏於京師三秦大戶置之於邊地以應圖讖之言堅訪之王猛猛以彫爲左道惑衆勸堅誅之後堅以其言有驗追贈彫官

宋

〔圖畫見聞志侯封邠州永壽人工畫山水寒林始學許道寧不能踐其老格然而筆墨調潤自成一體亦郭熙

之亞

明

〔輶軒瑣記〕隆慶初永壽縣淡村有術者云近世乃下元甲子用事正直天市垣所以人多好市井牟利之事

按乾志云州人不嫻技術而醫學尤疎蓋合屬邑言之自昔然矣

本朝乾隆初有岐山人趙奇精女科挾術來遊其子必伸善治傷寒活人甚衆遂家於縣南之監軍鎮必伸之子魏能讀祖父書於思邈千金方尤得要旨遠近知名五十三年冬十一月有司獎異之爲顏其堂額曰三世良師

仙釋

元

金笥瑣探道家謂蟾蜍萬歲背生芝草食之換骨上昇至正中乾州永壽縣南清宣觀有住持殷純者晨起汲水得諸笥井旁初不知何物也煮而食之偃卧寂然者旬日儕輩謂其已死棺殮座山下月餘忽走入觀問訊如平時頃之失所在衆皆駭惑發棺視之惟衣履存焉

明

舊志石寶金號碧峰禪師有異行嘗趺坐大樹下溪水橫溢人意禪師已死七日水退視之燕坐如常後遊五臺山元順帝名至燕都慰勞甚至洪武初奉詔至南京

住天界寺時召問佛法及鬼神情狀奏對稱旨御製詩

以賜之及卒翰林學士宋濂爲撰舍利塔銘

銘載藝文類

歸田集跋碧峰禪師塔銘金陵梵刹志載碧峰寺記稱師棄髮存鬚出使西洋諸國授爵固辭按俗所傳西洋記稱碧峰同三寶太監下西洋事蓋委巷小人之語寺記殆承此訛也鄭和等使西洋自永樂七年師示寂久矣記又稱師祈雨靈異爲眞人所憎投之水火無損後辭歸西域已時陞辭期午時出潼關是日以上賜袈裟遣守關吏奏上按師生於乾州永壽縣而曰西域胡僧示寂金陵茶毗聚寶山而曰辭上西歸世壽六十有五而曰年逾七十益又謬矣明初大浮屠惟碧峰最著流

傳神異未易更僕寺記所載皆非實錄他可知已

本朝

張志已亥六月有道士過永旅食塗中憩於城隍廟三日取筆留題不書姓名閻人得遺詩以報閱其詩卓有才思令人蹤跡渺不知其所之

詩載藝文類

列女

唐

舊志竇氏二女強化里江竇村人幼有志操永泰中羣盜剽掠二女匿岩穴中盜跡而得之將逼以私行臨深谷姊曰吾寧死不受辱卽投崖死妹繼之亦折足破面盜義之而去京兆第五琦奏其行烈詔旌異之伊村有

永壽縣新志卷七

十二

廟通志曰奉天人蓋永壽乾之隸也今竇氏族甚著按唐永泰中永壽縣屬邠州非乾隸也舊志失考

元

舊志田氏三婦上宜里人長適郝年二十一仲適周年十八季適胥年十七夫俱亡守節無玷有司以聞詔旌表其門

明

舊志胡氏生員李棟妻年二十五 李氏縣民趙學妻年二十六夫亡無子俱以節烈終 楊氏生員任廷舉妻年十九 祁氏生員宋宇妻年二十一 劉氏生員楊順妻年二十五 傅氏生員王在程妻年二十六夫

卒撫幼子成立俱以守節終 王氏縣民劉宗樂妻年十九夫亡撫遺腹子成立萬歷二十年終壽七十 許氏生員樊希思妻年二十五善事翁姑妯娌無間言夫亡矢同穴嘔血以死 王氏俎登妻年二十五夫卒遺三歲孤叔翁強氏他適則溺其孤幸有援者得不死孤長成弗祿乃撫育諸孫備嘗艱苦以壽終 魯氏縣民李油然妻年二十五夫卒富室遺妯填門叔伯欲奪其節氏截髮示志以織紵餬口守節三十一年壽五十六 騫氏生員張簡妻年二十八剛介有丈夫風夫卒妾趙氏生一子方周歲氏撫育勤劬不啻已出事孀姑以孝聞後族有謀傾藐若孤者氏百計保護得成立壽七

十五令表其慈節 師氏縣民王養中妻年二十二夫亡撫一歲孤成立翁姑不祿喪葬如儀而又調其猶子之貧乏者壽六十 騫氏騫九思女幼字趙本初趙故富而騫家漸蕭索趙遺書罷婚九思頷之女曰不死奈辱先人何乃澡身整服半臂禪襦以至副膝腳帶一切密紆之強婢導至趙所呼冤自刎死之日尸不殭目不瞑溽暑色澤如生異香馥郁遐邇觀者無不隕涕邑令杜庀木以殮方天開日霽俄而迅雷驟雨一邑震驚杜撰哀詞奠之則開霽如初得襄事邑諸生具呈擬達之當道而趙氏懼獲戾夤緣格之直指使王觀風下邑偶於邑乘內獲其呈蓋令下之吏所嚮署誌中未及檢取

而遽以投院者也儼若有鬼神使之矣直指使愕然於時移檄旌異曰真烈女諸扁題甚偉不具錄有爲之傳者曰豳風未泯正氣鍾毓以繼二竇之烈良無愧歟師氏小字嬌姐師第女第與族人師訊構訟訊病死其母誣以毆訟之令第逃匿捕者詣其家偶牽女衣女不勝憤沮自縊而死事在萬歷三十四年里人匿不發逾十載始聞之縣學諸生云 巨氏縣民師誥妻割臂啖夫嚼指矢志 白氏縣民李行保妻與嫂同嫠獨凜栢舟之節撫姪如子竟延李氏之宗 楊氏生員史書妻年二十四夫亡甘守清貧育子鉅典成立得叨青衿以壽終焉 員氏縣民趙應聘妻年二十三無子止一女

勵志撫養出閨年七十遇奇荒塞戶絕隣不食而死
陳氏貢生俎衍溱妻氏抱幼女與姑被賊同擄賊欲刃姑挾氏行氏奪賊刀殺女自刎賊驚異之姑乃得釋
本朝

張志近聞之里民有師氏者生員羅珍妻盡孝奉其姑勵節成其子有劉氏者廩生談吐瑋妻孝事孀姑育成孤子有劉氏者邑民張尙餘妻謹事翁姑生養死葬教訓孤子入庠不幸早亡乃撫二孫成立壽已八十此皆以青年矢志栢舟但事定蓋棺姑錄之以備采風者
縣冊盧氏甘肅環縣民趙會妻寄籍縣南之樊家坪氏因李六強姦不從被害捐軀明志節烈堪風乾隆十一

年奉

旨旌表 師氏邑人夏泉妻翁姑早逝夫亡忍死撫育繼子以綿嗣續子甫娶而天家計蕭索與孀媳張氏相依守節復繼族孫承祀日夜操作撫養成人宗緒賴以弗墜守節三十八年乾隆十二年奉

旨旌表 都氏邑人李翔鳳妻夫亡孀姑在堂矢志苦守親隣閔其年少微勸改絃卽哭誓幾絕以夫兄次子協焯繼嗣教育辛勤撫如已出事姑晨昏不懈績紡以供饗殮姑歿之後喪葬盡禮鄉黨稱焉焯年弱冠卽遊庠序守節三十三年乾隆十二年奉

旨旌表 任氏邑人夏芳妻夫死遺孤僅周歲忍死撫育姑已先逝翁因哭子喪明病卧床褥氏賣髮延醫服藥無效翁又不祿氏茹苦自甘織紵餬口守節三十八年乾隆十二年奉

旨旌表 董氏邑人周鏡妻夫亡姑老遺雛甫二歲氏矢志栢舟茹荼自勵事姑盡孝訓子有方姑歿喪葬如禮長子師孔遊庠閭里稱爲慈孝守節五十五年乾隆十二年奉

旨旌表 夏氏邑人王立妻夫亡翁姑在堂家貧如洗每日磨賣豆腐供食生事死葬盡禮盡哀氏夫胞弟王琚胞姪王道洽幼弱無依撫訓成立入武庠領鄉薦守節五十四年乾隆五十二年奉

旨旌表 劉氏車平里人騫永倉妻年十五歸騫三載夫
亡亡後七日方得一男名福彰卽生員騫守信之父也
又二年翁亦病故惟姑劉氏在堂家徒四壁親族多勸
氏改適氏蓬首垢面誓養老姑晝耕夜織撫育稚子娶
婦成家有孫入泮享年七十而終乾隆三十七年孫大
令陳廣文俱給扁旌之曰松筠勁節節孝雙全 蒙氏
寧化里人陳所倉妻年十五歸陳夫亡姑老二子俱幼
氏矢死靡他茹荼操作養姑盡孝育子有成享年七十
有一王大令祁廣文俱給扁云栢舟自誓貞烈可風
學冊成氏車平里人李振義妻年十六歸李生三子自
新自植自綦夫死家貧氏茹苦自甘育諸子成立自植

遊庠自新自綦俱食餼守節五十餘年享壽八十 傅
氏車平里人李自選妻年十五而嫁嫁四年而夫亡遺
孤李琴尚在襁褓氏勵志冰霜養孤成立鄉里稱焉
張氏上彭里廩生來宣妻夫亡子秩幼穉伶仃氏矢志
食貧撫孤成立守節三十餘年 尙氏寧化里民張宏
昌妻嫁八年而夫歿遺孤名可造僅二歲孀姑年七十
餘氏養姑育子艱苦備嘗後可造成立遊庠孫張儒學
武相繼入類氏守節六十年壽八十有四卒 王氏上
彭里廩生張元仕妻年二十七而寡矢志靡他嗣夫兄
之子爲子教育成名守節數十年卒 齊氏邑民任作
勤妻年十九夫亡嗣一子名百祥撫養成立授室未久

百祥又歿妻魏氏年二十四遺孤名鴻儒甫一歲是時齊氏漸老魏氏養孤抱子備歷艱辛卒成雙節云 李氏廩生傅連登妻年十九而寡遺孤永春最幼家四壁氏朝春夜績備茹百苦娶媳張氏生孫俊義教養成立補縣學生員氏守節五十餘年卒

按前廣文張君培言邑民王自适妻任氏年二十四夫亡遺一子一女家極貧而誓無他心後子女相繼死節操益堅顧氏猶生存張志有事定蓋棺之論附書簡末永式彤徽度鄉閭巾幗追芳躅而勵貞風者不復以格於成例爲憾云

